



ATASSUT INATSIARTUNI

ATASSUT

UKA 2013/39-1

Siverth K. Heilmann

02.10.2013

Suliffeqarfiit namminersortut pitsaasumik, inerititaqarfiusumillu iliuuseqartut, avatangiisinut mingutsaaliuinnermikkut, nukissiuutit mingutsitsinngitsut atornerisigut, aammalu co2-mik aniatitsinermikkut annikillisaasut akissarsisinneqartalernissaannik Naalakkersuisut sulissuteqaqqullugit Inatsisartut aalajangiiffigisassaattut siunnersuut.

(Inatsisartunut ilaasortat Gerhardt Petersen aamma Siverth K. Heilmann, Atassut)

Siullermik ATASSUT-mit erseqqissaatigissavarput ilisimaarigatsigu Namminersorlutik Oqartussat pinngortitamik avatangiisinillu mianerinninneq pillugu nersorinnilluni akissarsisitsisalernissaat Inatsisartut 2004-mi aalajangiutereernikuugaat.

Taamatuttaaq inunnik ataasiakkaanik suliffeqarfinnillu pinngortitamik avatangiisinillu mianerinninnermikkut maligassiuusut aalaakkaasuunngikkaluartumik aammalu assigiinngisitaartunik qulequtsikkanik aningaasaminernik nersornaasiisoqartartoq.

ATASSUT-mit kissaatigaarput akissarsisitsilluni nersornaasiisarneq maannamut atuuttoq annikippallaartoq, taamaammallu ataqatigiissaagaalluernerusumik aalaakkaasuunerusumillu taarserneqartariaqartoq, tamannalu Inatsisartut qulakkeertariaqaraat.

Kingumummi qiviarutta 2004-ip kingorna nukissiuutit mingutsitsinngitsunik atuinermikkut aammalu CO₂-mik aniatitsinermikkut annikillisaasut qiimmassarneqarnerat immi ajunngikkaluarluni tamatsinnut pilerinarsaaneq suli annikippallaartoq, nittarsaassineq annikippallaartoq aammalu periarfissarititaasut iluanni mingutsitsissutaanngitsunik nukissiuutinik atuisut annertusaanissaminnut kajumissaaserneqartarnerat ullumikkumit annertunerusariaqartoq sunniuteqarluartumik kinguneqarluartumillu pinngortitamik avatangiisinillu mingutsaaliuineq annertusarneqassappat.



ATASSUT INATSIARTUNI

Taamammat matumani siunnersuut siammasinnerusoq aammalu inuianguusugut nukissiuutinik ataavartunik atuinissatsinnut annertunerusumik sunniuteqarsinnaasoq isumaqarluinnarpugut.

Soorlu siunnersuutitsinnik saqqummiussisup tikkuareeraa akissarsisitsisarneq suliffeqarfinnut namminersortunut samminerutipparpud, akissarsisitsisarnerlu mingutsitsinnginnerulernissamik siunertaqartunut aningaasanik tunniussinikkut pisarsinnaavoq, imaluunniit nukissuutit mingutsitsinngitsut akissarsiarineqarsinnaappud, imaluunniit suliffeqarfiup arlaatigut nammineq iluaqutigisinnaasaanik akissarsititsineq iluseqartinnearsinnaalluni.

ATASSUT-mit neriuutigilluinnarpud akissarsisitseriaaseq ullumikkut atuuttoq, oqarluaannarlunilu ersinngingajattoq ersarissumik sunniuteqarnerusinnaasumillu taarserneqarnissaanut Inatsisartoqativut piumassuseqarluassasut, minnerpaamilluunniit ullumikkut Namminersorlutik Oqartussat nersorinnittarnerat akissarsisitsisarnerallu nalilersorluarsinnaajumallugu pitsanngorsarneqarnissaanillu piumassuseqassasut.

Taamatut oqaaseqarluta ATASSUT-mit inassutigissavarput siunnersuut akuersaartumik suliarineqassasoq, aappassaaneerneqartinnagulu Inatsisartut Eqqissisimatitsinermut Avatangiisinullu Ataatsimiititaliaannut ingerlateqqinneqassasoq.